

Co vai cun ils giuvenils durant la pandemia da corona?

Per il tractament acut da giuvenils han ils Servetschs psichiatics dal Grischun PDGR avert la nova staziun «P1 akut» en la clinica Waldhaus a Cuira.

Lisa Peers Dermont/FMR

A chaschun da la conferenza da medias da mardi han *Reto Mischol*, cau-psicholog per uffants e giuvenils, *Heidi Eckrich*, directura da la partiziun per uffants e giuvenils e *Stefan Gothmann*, manader da la nova partiziun per psichiatria da giuvenils dal Waldhaus preschentà la nova partiziun per giuvenils «P1 akut» sin l'areal da la clinica Waldhaus a Cuira. Plinavant han els infurmà davart las consequenzas da corona sin il bainstar psychic dad uffants e giuvenils.

Tgi vegn tractà sin la staziun «P1 akut»?

Tar la staziun «P1 akut» sa tracta i dad ina schliaziun transitoria fin che la nova clinica per psichiatria dad uffants e giuvenils avra sias portas l'onn 2025 sin l'areal da la clinica Waldhaus a Cuira. La staziun porscha plaz a tschintg giuvenils tranter 14 e 18 onns. Ella è necessaria per stgargiar la staziun d'urgenza per creschids. En il center da la staziun stat nov il tractament acut da giuvenils. «Acut» na munta betg terapia che cuzza lung temp, mabain mesiras d'urgenza da duas fin trais emnas per stabilisar la pazienta ni il pazient. Ils pazients arrivon per exempel suenter in act ni cura che in act suizidal vegn spetgà. Il nov manader Stefan Gothmann di: «Ils uffants e giuvenils na vegnan betg voluntariamain. – I sa tracta dad ina mesira sfurzada.»

22% daplì servetschs psichiatics ambulants

Ils davos dus onns ha la PDGR nudà 22% daplì servetschs psichiatics ambulants. Plirs studis demuossan che en spezial persunas da 15 fin 25 onns pateschan fitg da la pandemia. Oravantut mattatschas e giuvnas, persunas cun experientschas da migraziun, ma era uffants e giuvenils da famiglias cun problems finansials han fadia cun la pandemia. I vegnan observads musters da reagir che pon vegnir attribuids a la vegliadetgna. Uffants reagischan cun ina irritabilitad augmentada e problems da sa concentrar. Uffants pli vegls e giuvenils cumbattan perencunter cunter depressiuns e sintoms da tema. Tenor Heidi Eckrich: «I dat gia studis en Germania che demuossan in grond effect da la pandemia sin il bainstar psychic dad uffants e giuvenils en citads.»

La sanadad psichica

Tge facturs han actualmain in'influenza sin la sanadad psichica da giuvenils?

limitaziun dal moviment dal corp

mancanza da rutina tras midadas da moda da scolaziun

mancanza da contacts cun amias ed amis uschè impurtants per la socialisaziun ed il svilup da l'identitad

malsegirtads davart l'agen futur

augment da dispitas en famiglia e violenza a chasa